

## GALESIYA

Alagepa faigoko gemo'a aino atagu faeno uneno hu'nige'a Yu nofi vayapati'mo o'mai'naya vaya'mogimo afite'apae'mo apakesa afi'a fatago hu'nae. Polo'a Galesiya kotegamo mai'naya vaya'mo alu nofi vaya'aife'mo alagepa faigoko gege'mo aeno hakalo huno hapa pai'niya'monanafa mago vaya'mogi Galesiya siosi vaya'aife'mo, Ha'ao, Mosese ke'aepa gemo akame osisayana Goti vaya'amo afa'a o'maigae, hu'a hapa pai'nae. Polo'a ani hosu gemo alino api aino ate'niye. Sapata 1-4 gefi'mo hogoteno Polo'a, Yesu Kalaisi'a alagepa faigoko ge'amo agai'amo alino nave li'nige'na age'nove, huno avo'mo kaeteno alagepa faigoko gemo aepa'a'e'mo avo'mo kae'niye. Sapata 5 gefi'mo agaemo mago'e gemo huno'ae'mo, Goti Auneme'amo'mo hau'niya kava'mo akame hutapa maiyo, huno avo'mo kae'niye.

<sup>1</sup> Nagaemo Polo'namo Goti apa veka'amo mai'ne'nae'mo avo'mo nekaove. Ma mopafi vaya'mogi apa ali'yate'mo lekana pai'a o'nate'nageno Goti'a mago vaya'aiteti'mo navaleno o'nate'niye. Yesu Kalaisi'e Afotimo'mo Yesu Kalaisi'a fali'niyateti'mo alino he tino ate'niya Goti'e'mo lekana pai'ana natete'ana apa ali'yate'mo navale'ana nate'na'ae.

<sup>2</sup> Nagae'e muki nagae'e'mo magokepi lokae'a mai'naya konagatapimogi'e'mo Galesiya

kotega alita anupa hutapa mai'naya siosi'ale siosi'alefe'mo ge nelapamamaone.

<sup>3</sup> Goti'a Afotimo'e Ala kava netimo Yesu Kalaisi'e'mo fiku lapa mae'ana lapami'anageno lapaipamo'mo falu hino.

<sup>4</sup> Goti'a Afotimo'mo hau'nigeno Kalaisi ge'amo akame huno hemenimo ma mopafi hane'niya hosu kavategati'mo lagufamo alino katino late-siyafe'mo hosu kavatilefe'mo agufamo amiteno fali'niye.

<sup>5</sup> Goti agi'ale'mo muki afina'ae afina'ae'mo alita asaga huge huge huta maigetao.

*Alagepa faigoko gemo magoke'ageke'mo hane'niya gema*

<sup>6</sup> Aise afina'mo utegetapae'mo Goti'a lapakaefe'mo keya aeno ge huteno Kalaisiteti'mo fiku lapa maeno lapami'niya vekamo ataletapa alu faigoko gemo afisayafe'mo ne'vage'na nahau ai'nove.

<sup>7</sup> Alu alagepa faigoko gemo ohane'niya'monanafa mago vaya'mogimo alagepa faigoko gemo ali'a ai'a ataginovano gemo hute'a lapakesamo nefaigetapae'mo lapausoli nehae.

<sup>8</sup> Lagaemofi koku'napati'mo eminesiya enisole vekamo'mofi huta alagepa faigoko gemo lapa pai'nona gemo ataleta alu faigoko gemo aeta hakalo huta lapa paisunana Goti'a alino laha faitalenageta alagi lageso hino.

<sup>9</sup> Hogoteta ani gemo ago hu'nonanage'na hemenimo halate mago'e hu'na ani agufa gege'mo hu'nae'mo, mago vaya'mogi ago lapa

pai'nonagetapa afitetapa ali'naya gemo osu'a alu faigoko gemo lapa pai'nisaya'mo'mo Goti'a alino hapa faitalenage'a alagi lageso hiyo, hu'na nehuve.

<sup>10</sup> Nagaemo vaya'mogi amuse hu'a natesayafe'mo naha'ye nehige'na kahauya nehufiye. Ha'ao, Gotike'mo amuse huno natesiyafe'mo naha'ye nehige'na kahauya nehuve. Hogote'na vaya'aife'mo nagesamo afi'nova'monanafa hemenimo amuse hu'a natesayafe'mo naha'ye nehisige'na kahauya nehuvesinana Kalaisi ali'ya'ale'mo o'mauvesine.

*Polo'a Goti apa veka'amo hamale'niya kavafe'mo ava gemo hu'niya gemae*

<sup>11</sup> Konaga'nimogitapae, ma mopafi vaya'mogi alagepa faigoko gemo ae'na hakalo hu'na hapa nepauva gemo aepa vaya'mo o'mai'nae, hu'na lapa nepauva gemo alagepa huta afiyo.

<sup>12</sup> Nagaemo mago vekalegati'mo mani gemo o'alige mago vekamo'a alino naya o'malege hu'niyana Yesu Kalaisi'a agai'age'mo alino nave li'nige'na agete'na afi'nove.

<sup>13</sup> Lapakaemo ago afi'nayana Yu nofi vaya'mogi nehaya kava hu'na mono hu'nova kavafe'mo nava gemo ago afi'nae. Nagaemo Goti siosi vaya'alegamo lusi kava hu'na naini hu'na apatete'na siosi vaya'mo ali'na hano hu'na apatalesuvafe'mo hu'nove.

<sup>14</sup> Nagaemo Yu nofi vaya'mo nehaya kava hu'na mago'e hu'na huli'na ne'u'nae'mo nafalu'nimogimo ago ae'na apakase'na laginago

vaya'ai gemo akame nehu'nae'mo lusi kava hu'na nayamukiki hu'na mai'nove.

15 Hu'na mai'nova'monanafa ita'nimo'mo alino o'nate'nigeno'ae'mo hogoteno Goti'a hau'niya afina'mo agai'alefe'mo ago lekana paino nateteno fiku naha maeno nami'niya kavateti'mo nagaefe'mo keya aeno ge hu'niye.

16 Agaemo Mafa'ne'ae'mo ava gemo malaga nofi vaya'aife'mo ae'na hakalo hu'na hapa paisuvafe'mo Goti'a hau'niya afina'mo Mafa'ne'amo naipafi'mo alino nave li'nige'na agete'nae'mo u'na mago vaya'e'mo ge huge afige hu'na o'mai'nove.

17 Nagaemo hogote apa vaya'mo u'na apakesuvafe'mo Yulusalemu taonifi'mo o'u'nova'monanafa Alepiya kotegamo u'na ka'me kote'mo maige'na halate ai'na atagi ne'na Namasakasi taonifi'mo e'na mai'nove.

18 Lole'e mago'e kafugamo utege'na Pita'mo u'na agesuvafe'mo Yulusalemu taonifi'mo u'na lole salemo mai'ne'nae'mo

19 mago alu apa vaya'amo o'apake'nova'monanafa Yemisi'a Ala kava ne'mo agana'amoke'mo age'nove.

20 Goti aulagale'mo mai'ne'nae'mo aigofe gemo nosufa alagi lama gemo hu'na avo'mo nekaove.

21 Henaga'amo Siliya kotega'e Silisiya kotega'e'mo u'na mai'noge'apae'mo

22 Yutiya kotega siosile vaya'mo Kalaisipi'mo mai'naya vaya'mogimo naugosamo o'nage'nae.

23 O'nage'naya'monanafa mago vaya'mogi, ani vekamo'a aini huno lateteno apakesa afi'a ftago hisaya faigoko gemo alino hano huno atale-

siyafe'mo hu'niya vekamo'mo hemenimo ani gemo aeno hakalo huno hapa nepaiye, hu'a hapa pai'nage'a afite'apae'mo

<sup>24</sup> nagaeteti'mo Goti agi'ale'mo ali'a asaga hu'a ate'nae.

## 2

*Polo'e mago alu apa vaya'e'mo magoke apaipa apakesamo ali'naya gemae*

<sup>1</sup> Inagi fotini'a kafugamo maite'nae'mo halate Yulusalemu taonifi'mo Manamasi'e'mo Taitasi'mo avalelita'a u'no'ae.

<sup>2</sup> Goti'a uvo, huno naha paino alino nave li'nige'na agete'nae'mo hai'nove. Hai'na muki vaya'ai apaulagale'mo hapa opai'na ala apaki vaya'aifeke'mo alagepa faigoko gemo malaga nofi vaya'aife'mo ae'na hakalo hu'na hapa nepauva gemo ali'a fako hu'a afisayafe'mo hapa pai'nove. Fiku yanageno ali'ya'mo ali'nova kava'nimo'mofi ali'ya'mo alisuva kava'nimo'mofi huno ne'ya'amo afole o'aigiye, hu'na nagesa afi'nove.

<sup>3</sup> Taitasi'a navagi hu'niya vekamo Galiki nofi vekamo mai'niya'monanafa, Yu vaya'mogita mono nehuna kava hutapa agufamo lagautapa ataleyo, hu'a laha opai'naya'monanafa

<sup>4</sup> mago vaya'mo aigofe konagatimogimo agufamo lagau'a atalesayafe'mo hapau'niye. Ani vaya'mogi kesi kateti'mo lamata huli'a e'a alita anupa huta mai'nona vayapi'mo e'a fale'a mai'nae. Kalaisi Yesu'a hatu maeno late'nigeta agaepi'mo afa vaya'mo mai'nonage'apae'mo kalavusi hu'a latete'a ke'aepa gemo

afe'alumelagamo ali'a latesayafe'mo e'a lamata  
hu'a mai'naya'monanafa

<sup>5</sup> Lama ge alagepa faigoko gemo lapakaeteg-  
amo afa'a hanege hanege huno hanesiyafe'mo  
lagaemo hu'naya ge'apilefe'mo he huta osuta  
ge'apimo alagi o'afi'none.

<sup>6</sup> Mago vaya'mogi ala apaki'apimo  
ali'naya'monanafa afa'a ina agufa yane, hu'na  
ani apaki'apie'mo nagesamo no'afuve. Goti'a  
ali'naya apaki'apilefenagi apakufalefenagi huno  
agesa no'afiye. Ani ala apaki vaya'mogimo  
mago'e gemo ali'a naya o'male'naya'monanafa

<sup>7</sup> apakaemo ago age'nayana Goti'a Pita'mo  
Yu vaya'aife'mo alagepa faigoko ge'amo  
aeno hakalo huno hapa paisiyafe'mo lekana  
paino ate'niya kava huno Polo'a malaga nofi  
vaya'aife'mo alagepa faigoko ge'amo aeno  
hakalo huno hapa paisiyafe'mo lekana paino  
ate'niye, hu'a ago nage'nae.

<sup>8</sup> Goti'a himamu'aleti'mo Pita'mo lokiya vaino  
ate'nigeno Yu nofi vaya'aitegamo ne'viya kava  
huno Goti'a himamu'aleti'mo lokiya vaino  
nate'nige'na malaga nofi vaya'aitegamo ne'uve.

<sup>9</sup> Ala apaki ne'apamiya vaya'mo Yemisi'agi  
Pita'agi Yoni'agi hu'a nage'nayana Goti'a  
Polo'mo fiku ha maeno amiteno mani  
aote ali'yate'mo avaleno ate'niye, hu'a  
nagete'apae'mo nagae'e Manamasi'e'mo ali'a  
afalu afalu kava'mo hu'a apaya'mo la'ami'nae.  
La'amite'apae'mo, he kanalenagi utana malaga  
nofi vaya'aitegamo ali'ya'mo ali'agetao lagaemo  
Yu nofi vaya'aitegamo uta ali'ya'mo aligune,  
hu'a la'aha pai'nae.

10 Ani kavatefe'mo mago alu gemo osu'nafa magoke gemo hu'apae'mo, lagaepati'mo kagemi ya'apimo o'male'nisaya vaya'aife'mo lanake okanitana hapa mae'ao, hu'a la'aha pai'nae. Ani kava'mo hisuvafe'mo lusi kava hu'na nayamukiki nehuve.

*Polo'a Pita'mo alino api aino ate'niya gemae*

11 Inagi Pita'a Atiyoki taonifi'mo eno hosu kava'mo hu'niya'mofe'mo agaefe'mo aulagafi'mo ge hau'nove.

12 Hogoteno malaga nofi vaya'e'mo magokepi lokaeno ne'ya'mo ne'nige'apae'mo mago vaya'mo Yemisitegati'mo e'a ava'yi hu'nageno'ae'mo ani apakufamo lagau'a ne'atalaya vaya'aife'mo koli hu'nenno malaga nofi vaya'mo apataleno uno aote mai'niye.

13 Yu konagatimogi ani hosu kava'mo amega apakufamo'mo hau'niya kava'mo hu'a vaya'aife'mo koli hu'naya'mofe'mo Pita'e'mo hosu kava'mo hu'niye. Manamasi'e'mo ayate ali'nageno apakame hu'niye.

14 Nagaemo agovana lama ge mono kava'mo alagepa faigoko gemo akame hu'a alagepa kate'mo o'u'nage'na apakete'nae'mo muki vaya'ai apaulagale'mo Pitafe'mo, Kagaemo Yu nofi vekamo mai'nana'monanafa Yu nofi vaya'ai kava'mo osuka malaga nofi vaya'ai kavake'mo nehane. Na kava hige'kae'mo malaga nofi vaya'mogimo Yu nofi vaya'mogi nehaya agufa kava'mo hisayafe'mo alika he tika apatesanafe'mo nehane, hu'na ge hau'nove.

15 Yu vaya'mogi malaga nofi vaya'aife'mo, hosu vaya'mo mono nosaya vaya'mo mai'nae, hu'a nehaya'monanafa ani nofi vayapi'mo o'mai'nonage'apae'mo Yu nofi vayapati itatimogimo ali'a late'nageta Yu nofi vaya'mo mai'none.

16 Lagaemo afi'nonana Goti'a ke'aepa ge'amo akame nehaya kavateti'mo, naulagale'mo fatago vaya'mo mai'nae, huno hapa nopaiya'monanafa Yesu Kalaisifeke'mo apakesa afi'a fatago nehaya kavatetike'mo, naulagale'mo fatago vaya'mo mai'nae, huno hapa nepaiye, huta ago afi'none. Goti'a ke'aepa ge'amo akame nehuna kavateti'mo, naulagale'mo fatago vaya'mo mai'nae, huno laha opaigiya'monanafa Kalaisifeke'mo lagesa afita fatago nehuna kavatetike'mo, naulagale'mo fatago vaya'mo mai'nae, huno laha paisiyafe'mo lagae'e'mo Kalaisifeke'mo lagesa afita fatago hu'none. Goti'a muki vaya'aife'mo, ke'aepa ge'nimo akame hisaya kavateti'mo naulagale'mo fatago vaya'mo mai'nae, huno nosiya'mofe'mae.

17 Goti'a Kalaisipi'mo mai'nonageno'ae'mo, naulagale'mo fatago vaya'mo mai'nae, huno laha paisiyafe'mo ke'aepa gemo'a laha o'maegaiye, huta huteta atalesunage'apae'mo, hosu vaya'mo mai'nae, hu'a hugaya'monanafa Kalaisi'a hosu kava'mo hisuna ka'mo valino late'nifiye. Ani agufa gemo osutapa alagi atalegeno hano hino.

18 Lagaemo heta halagape vaita atale'nona ya'mo halate alita he tita atesuna'mo'mo hosu kavake'mo hugune.

19 Goti ke'aepa ge'amo'mo alagi kamiti nam-



agi'nige'na fali'nove. Goti'a hau'niya kava'mo hisuvafe'mo ke'aepa ge'alefe'mo ago fali'nove.

20 Inagi Kalaisi'a malipu yosale'mo fali'nige'nae'mo agae'e'mo fali'nova'mofe'mo hemenimo afa'a o'mai'nova'monanafa Kalaisi'a nagaepi'mo mai'niye. Hemenimo ma mopafi'mo mai'ne'nae'mo Goti Mafa'ne'ae'mo nagesa afi'na fatago nehuva kavatetike'mo afa'a mai'nove. Agaemo nagaefe'mo hau ayamopafi'mo hau'nigeno falino nate'niye.

21 Goti'a ke'aepa ge'amo akame nehaya kavateti'mo, naulagale'mo fatago vaya'mo mai'nae, huno hapa nepaiyesinana Kalaisi'a afa'a fiku fali'niyesine. Goti'a fiku naha maeno nami'niya yafe'mo, afa'a ina agufa yane, hu'na nakame'ya o'ami'nove.

### 3

*Ke'aepa gemo akame nehaya kava'e apakesa afi'a fatago nehaya kava'efe'mo hu'niya gema*

1 Galesiya vaya'mogitapae, alagi lusi kava hutapa negi ne'malae. Ina la'mo negi nofi'mo aeno lapami'nigetapae'mo lama gemo akame nosae. Lagaemo Yesu Kalaisi'a malipu yosale'mo fali'niya kavafe'mo ava gemo lapaulagafati'mo age'negekana hutapa afisayafe'mo lapakae folagapi'mo mai'neta aeta hakalo huta ago lapa pai'none.

2 Magoke kavafe'mo ge hu'na lapafi gesuvafe'mo huve. Lapakaemo ke'aepa gemo akame hu'naya kavateti'mo Goti Auneme'amo ali'nafi

Kalaisife'mo ava gemo afitetapa lapakesa afitafatago hu'naya kavateti'mo ali'nae.

<sup>3</sup> Lapakaemo Goti Auneme'aleti'mo aepa fai'naya'monanafa lagaitimo haita hapaigune, hutapa negi ne'malafiye.

<sup>4</sup> Kanamo ali'nageno Goti'a alagepa huno lapa mae'niya kava'mo afa kava'mo hane'ninageno alagamo o'ae'nisifiye. Nagesa afuvana alagamo ago ae'negaiye.

<sup>5</sup> Lapakaemo Goti ke'aepa ge'amo akame nehaya'mofe'mo Goti'a agai'a Auneme'amo alino lapamige lapaipafi'e lapaopale'e'mo aune kava'mo huge nehifi Kalaisife'mo ava gemo afitetapa lapakesa afitafatago nehaya kavateti'mo aune kava'mo nehiye.

<sup>6</sup> Emalehamu'a ani kava huno aghesa afino fatago hu'niye. Goti Mukufi avo'mo kae male'niya gemo'a huno'ae'mo, *Emalehamu'a Goti ge'ae'mo aghesa afino fatago hu'nigeno'ae'mo, naulagale'mo fatago vekamo mai'nane*, huno ha pai'niye.

<sup>7</sup> Huno ha pai'niya'mofe'mo apakesa afi'a fatago nehaya vaya'age'mo Emalehamu aginago vaya'amo mai'nae, hutapa lapakesamo afiyo.

<sup>8</sup> Goti'a hogoteno apake'niyana malaga nofi vaya'mogimo apakesa afi'a fatago hisage'na apakete'nae'mo, naulagale'mo fatago vaya'mo mai'nae, hu'na hapa paiguve, huno apake'niye. Apaketeno hogoteno alagepa faigoko ge'amo Emalehamufe'mo polomasi gemo huno ha paino'ae'mo, *nagaemo kagaeteti'mo muki nofi vaya'mo fiku hapa mae'na apamisuge'a alagepa hu'a maigae*, huno ha pai'niye.

9 Ha pai'niya'mofe'mo Goti'a agesa afino fatago hu'niya vekamo Emalehamu'e apakesa afi'a fatago nehaya vaya'e'mo magokepi fiku hapa maeno apami'niye.

10 Hapa ne'maeya'monanafa mago vaya'mogimo, Goti ke'aepa ge'amo akame nehuna'mofe'mo laha maegaiye, hu'a apakesamo ne'afiya vaya'aife'mo, hosu vaya'mo mai'nayanage'a alagi lageso hugae, huno nehiye. Ani kavatefe'mo Goti Mukufi'mo avo kae male'niya gemo'a huno'ae'mo, *Ina lagimo muki afina'mo muki ke'aepa ge'amo akame hu'a hano nosisafigeno Goti'a, hosu vaya'mo mai'nayanage'a alagi lageso hugae*, huno nehiye.

11 Goti Mukufi'mo mago'e huno avo kae male'niya gemo'a huno'ae'mo, *Goti'a apakesa afi'a fatago nehaya kavatetike'mo, naulagale'mo fatago vaya'mo mai'nae, huno hapa pai'nisige'a mai'nisaya vaya'age'mo alagepa hu'a maigae*, huno hu'niya'mofe'mo ago afi'nonana Goti'a ke'aepa ge'amo akame nehisaya kavateti'mo muki vaya'aife'mo, naulagale'mo fatago vaya'mo mai'nae, huno nosiye.

12 Goti aulagale'mo fatago vaya'mo maisayafe'mo Goti ke'aepa ge'amo akame nehaya kava'mo'a Kalaisife'mo apakesa afi'a fatago nehaya kavatefe'mo ohane'nifa alu kava'mo hane'niye. Ke'aepa gemo akame nehaya kavatefe'mo Goti Mukufi'mo avo kae male'niya gemo'a huno'ae'mo, *Goti ke'aepa ge'amo akame nehaya vaya'mo ani kavateti'mo alagepa hu'a maigae*, huno hu'niye.

13 Goti ke'aepa ge'amo akame osu'nonageno'ae'mo Goti'a, hosu vaya'mo mai'nayanagetapa alagi lageso hugae, huno hu male'niye. Hu male'niya'monanafa Kalaisi'a emineno lagae laimu'yale'mo mai'nigeno'ae'mo Goti'a, hosu vekamo mai'niyanageno alagi lageso hugiye, huno hu'nigeno'ae'mo Kalaisi'mo Goti'a lamagisiya kayo'mo alino ataleteno lageso osisunafe'mo miya faino hatu maeno late'niye. Goti mukufi'mo avo kae male'niya gemo'a ani kavatefe'mo, *Goti'a hosu kava'apilefe'mo yosale'mo asai male'naya vaya'aife'mo, hosu vaya'mo mai'nayanage'a alagi lageso hugae, huno hu'niye.*

14 Goti'a Emalehamufe'mo, fiku kaha mae'na kamiguve, huno polomasi gemo huno ha pai'niya ya'mo alu nofi vaya'mogi Kalaisiteti'mo alisayafe'mo hatu maeno late'niye. Goti'a muki vaya'amogitae'mo polomasi gemo huno'ae'mo, Naune'name'mo ali'na lapamiguve, huno hu'niya Auneme'amo lagesa afito fatago hisuna kavatetike'mo alisunafe'mo hu'niye.

*Ke'aepa gemo'mo Goti'a ani kava'mo huguue, huno hu'niya polomasi gemo aeno ati okaegaiye, huno hu'niya gemae*

15 Konaga'nimogitapae, alagepa hutapa afisayafe'mo ma mopafi kavategamo hu'na ae'na kalafefa gemo hugesuve. Ma mopafi vaya'mogi mago kotalake gemo hu malete'a apaki'apimo avo'mo kae male'nisaya'mo'mo mago vaya'mogi afa'a ae'a kalo opaegae. Mago

vaya'mogi afa'a ali'a o'atalege alu gemo ali'a magokepi'mo avo'mo kae'a o'malege hugae.

<sup>16</sup> Inagi Goti'a Emalehamufe'mo, fiku kaha maegauve, huno ha pai'niya polomasi gemo aginago vekae'mo, kaha maegauve, huno ha pai'niye. Goti'a Emalehamu aginago vaya'aife'mo ani gemo hapa opai'nifa magoke aginago vekae'mo ani gemo ha pai'niye. Ani magoke aginago vekamo Kalaisi'mae.

<sup>17</sup> Goti'a Kalaisitefe'mo kotalake ge'amo ago hu male'nigeno'ae'mo fo hataleti teti'a kafugamo utegeni Goti'a ke'aepa ge'amo alino Yu nofi vaya'mo apami'niye. Ani gemo aepa'ae'mo hu'nae'mo, henaga'amo afole ai'niya ke'aepa gemo'a hogoteno hu male'niya kotalake gemo fiku kaha mae'na kamiguve, huno ha pai'niya polomasi gemo alagi amagino o'atalegaiye.

<sup>18</sup> Vaya'mogi Goti ke'aepa ge'amo akame nehaya kavateti'mo Gotitegati'mo aligae, huno hu male'niya ya'mo ali'naesinana Goti'a fiku kaha mae'na kamiguve, huno ha pai'niya polomasi ge'aleti'mo afa'a o'ali'naesina'monanafa Goti'a Emalehamufe'mo, fiku kaha mae'na kamiguve, huno ha pai'niya polomasi geleti'mo fiku ha maeno ami'niye.

<sup>19</sup> Goti'a mani ke'aepa ge'amo'mo na agufa ali'ya'mo alisiyafe'mo alino apami'niye. Goti'a ke'aepa ge'aleti'mo alino ka'mo akani male'nisige'a Yu vaya'mogimo hosu kava'mo osisayafe'mo polomasi ge'e'mo alino magokepi lokaeno male'niye. Ke'aepa ge'amo haneme haneme ne'esigeno Emalehamu aginago'amo

emi'negaiye, huno agesamo afi'niye. Goti'a ani aginago vekae'mo, fiku kaha mae'na kamiguve, huno polomasi gemo huno ha pai'niye. Goti ke'aepa ge'amo enisole vaya'ai apavayafati'mo Mosesela folagate vekae'mo ha pai'nageno Yu vaya'aife'mo hapa pai'niye.

<sup>20</sup> Magoke vekae'mo fiku kaha mae'na kamiguve, huno ha paisiya'mo'mo folagate vekamo ali'ya'amo ohanegaiya'mofe'mo Goti'a Emalehamufe'mo, fiku kaha maegauve, huno ha pai'niya afina'mo folagate vekamo o'mai'nigeno'ae'mo hu male'niye.

*Ke'aepa gemoke'mo hogoteno yagaino late'niya kavafe'mo hu'niya gemae*

<sup>21</sup> Ke'aepa gemo'a polomasi gee'mo kame huno ne'atefiye. Ani gemo alagi atalegeno hano hino. Ke'aepa gemo'a afa'a maisaya ya'mo alino apami'niyesinana ani ke'aepa gemo akame nehaya kavateti'mo naulagale'mo fatago vaya'mo mai'nae, huno hu'niyesine.

<sup>22</sup> Hu'niyesina'monanafa Goti mukufi'mo avo kae male'niya gemo'a huno'ae'mo, hosu kava'mo'a muki ma mopafi vaya'mo kalavusi huno apate'niye. Yesu Kalaisifeke'mo apakesa afi'a fatago nehaya kavateti'mo fiku hapa mae'na apamiguve, huno hu male'niya ya'mo apakesa afi'a fatago nehaya vaya'mo alino apamisiyafe'mo kalavusi huno apate'niye.

<sup>23</sup> Hogoteta Kalaisife'mo lagesa afita fatago osu'nonageno'ae'mo ke'aepa gemo'a kalavusi huno lateme lateme ne'egenoa'ae'mo Kalaisife'mo

alagepa faigoko ge'amo lagesa afita fatago hisuna gemo lagaetegamo afole ai'niye.

<sup>24</sup> Afole ai'niya'mofe'mo ke'aepa gemo'a Kalaisitegamo lavalelino uno latesigeta Goti'a lagesa afita fatago hisuna kavateti'mo huno'ae'mo, naulagale'mo fatago vaya'mo mai'nae, huno hisiyafe'mo ke'aepa gemo'a yagaino nelateya vekagana huno hane'niye.

<sup>25</sup> Kalaisifeke'mo apakesa afi'a fatago hisaya gemo afole ne'aisigeno'ae'mo yagaino nelateya vekamo'a mago'e huno yagaino olategaiye.

*Goti mafa'ne'amo mai'nona gemae*

<sup>26</sup> Muki vaya'amogitapamo Kalaisi Yesufefe'mo lapakesa afita fatago hu'naya kavateti'mo Goti mafa'ne'amo mai'nae.

<sup>27</sup> Ani'mo fale'a ne'apataya kava huno Kalaisipi'mo faleno lapate'nigetapa Kalaisi'mo kukena vaigekana hutapa alita vaitetapa mai'nae.

<sup>28</sup> Kalaisipi'mo magoke aiyaya vaya'mo mai'naya'mofe'mo mago vaya'mo Yu vaya'mo maige mago vaya'mo alu nofi vaya'mo maige huta mai'none, hutapa osuge kalavusi ali'ya'mo ne'aliya vaya'mo maige afa vaya'mo maige huta mai'none, hutapa osuge ve maige a'ne maige huta mai'none, hutapa osuge nehutapa maiyo. Kalaisi Yesupi'mo mai'netapae'mo magoke aiyaya vaya'mo mai'nae.

<sup>29</sup> Lapakaemo Kalaisi vaya'amo mai'nisayana Emalehamu aginago'amo mai'nae. Mafa'ne'apimogimo afo'apimogi muki male'naya ya'apimo ne'aliya kava hutapa Goti'a

fiku kaha mae'na kamiguve, huno ha pai'niya polomasi geleti'mo muki ya'amo afa'a aligae.

## 4

<sup>1</sup> Ani kavatefe'mo mago'e hu'na ae'na kalafefa gemo hugesuve. Mafa'ne'amo'mo afo'amo muki kagemi ya'amo henaga'amo aligiya'monanafa ko osino aise mafa'nemo mai'nen'ae'mo kalavusi ali'ya ne'aliya vekagana huno mai'niye.

<sup>2</sup> Ali'ya'amo ne'aliya vaya'mogi ani mafa'nele'e kagemi ya'ale'e'mo yagai'a ateme ateme ne'esageno'ae'mo afo'amo'mo hu male'niya afina'mo afole aigiye.

<sup>3</sup> Ani kava huta aise mafa'negana huta mai'netae'mo ma mopafi ke'aepa gemo afe'alumelagamo kalavusifi'mo mai'nona'monanafa

<sup>4</sup> Goti'a hu male'niya afina'mo afole ai'nigeno'ae'mo Mafa'ne'amo alino ate'nigeno emine'niye. Mago ma mopafi a kanomo'mo alino ate'nigeno Yu ke'aepa gemo afe'alumelagamo mai'niye.

<sup>5</sup> Agaemo ke'aepa gemo afe'alumelagamo mai'nona vaya'mo miya faino hatu maeno late-sigeta Goti'a alopa mafa'ne'amo maisunafe'mo Yu ke'aepa gemo afe'alumelagamo mai'niye.

<sup>6</sup> Lapakaemo mafa'ne'amo mai'naya'mofe'mo Goti'a Mafa'ne'amo Auneme'amo alino ate'nigeno emineno lapaipafi'mo faleno haino mai'nigetapae'mo, Afo, Afotimogae, hutapa ge nehae.

<sup>7</sup> Inagi kalavusi ali'ya ne'aliya vaya'mo mago'e hutapa o'mai'nafa Kalaisiteti'mo Goti



mafa'ne'amo mai'netapa muki ya'mo afo'amo  
ya'mo alisayafe'mo mafa'ne'amo mai'nae.

*Polo'a Galesiya vaya'aife'mo lusi kava huno  
agesamo afi'niya gemae*

<sup>8</sup> Hogotetapa Goti'mo o'agetapa afa'a  
mai'netapae'mo hosu apaune vaya'mo aigofe  
gotitapimogi ke'aepa ge'apimo afe'alumelagamo  
mai'netapa kalavusi ali'ya'apimo alita  
mai'naya'monanafa

<sup>9</sup> hemenimo Goti'mo ago age'nae, hu'na  
huguva'monanafa Goti'a lapake'niye, hu'na  
hisuva gemo hane'niye. Lapake'niya'mofe'mo  
na kava higetapa Goti'a ataletapa aita atagi  
netapa ke'aepa gemo'a afa'a lapa o'maeno  
lokiya vaino olapatesiya gemo afe'alumelagamo  
maisayafe'mo lapau'niye. Halate kalavusi ali'ya  
ne'aliya vaya'mo maisayafe'mo nehafiye.

<sup>10</sup> Lapakaemo sapati afina'mo akame huge sa-  
ufa kai le kava'mo huge kafugamo hopa afina  
kava'mo huge hutetapae'mo aeto aeto hopa afi-  
nafe'mo lusi kava hutapa lapakesamo ne'afiye.

<sup>11</sup> Lapakaefe'mo nagesamo afite'na koli  
nehu'nae'mo, apakaetegamo afa ali'yapafi  
ali'nofiye, hu'na nehuve.

<sup>12</sup> Konaga'nimogitapae, hu'na, nagaemo  
hogote'na Yu vaya'ai ke'aepa gemo  
afe'alumelagamo maige'na atale'na e'na alu  
nofi vekamo lapakaekana hu'na mai'nove.  
Lapao ke hovanagi ani kava hutapa nagaekana  
hutapa ke'aepa gemo afe'alumelagamo o'maiyo.  
Nagaetegamo mago hosu kava'mo osu'nae.

13 Hogote'na lapakae'e'mo mai'nova afina'mo kaita nahau'nige'nae'mo visuva himamu'nimo ohane'niya'mofe'mo alagepa faigoko gemo ae'na hakalo hu'na lapa pai'nove.

14 Kanamo ali'nogetapae'mo, hosu vekamo mai'niye, hutapa lapakame'ya o'nami'nae. Mago enisole vekamofi Kalaisi Yesu'mofi huno esigeta-pae'mo lusi kava hutapa alita falu fala hutapa atesaya agufa kava'mo hutapa alita falu fala hutapa nate'nae.

15 Nagaemo lapakae'e'mo mai'nogetapae'mo lapamogaga ai'nae. Na agufa kava'mo afole ai'nigetapae'mo lapamogaga no'aiye. Lapa maesiya agufa gemo hu'nae'mo, apakaemo afa'a hu'naesinana apaulagamo ali'a kati'a nami'naesine, hu'na hapa nepauve.

16 Lama gemo lapa nepauva'mofe'mo kametapige'mo hamalet'e'na mai'nofiye.

17 Mago vaya'mogi lapakae lapao vaya'mo maisayafe'mo lapakaetegamo apayamukiki nehaya'monanafa lapakesamo faisayafe'mo nehae. Lapakaemo nataletapa lapayamukiki hutapa uta apakame hisayafe'mo apayamukiki nehae.

18 Vaya'mogi alagepa kava'mo hisayafe'mo apayamukiki hu'a ali'a apao ya'mo nehisayana kanalene. Hogotetapa nagaemo lapao vekamo maisuvafe'mo lusi kava hutapa nagaetegamo lapayamukiki hu'naya'monanafa hemenimo lapakae'e'mo o'mai'nova'mofe'mo o'ataletapa ani kavake'mo hutapa maiyo.

19 Nahau'niya mafa'ne'nimogitapae, hu'na, a'nemogimo mafa'nemo ali'a atesayafe'mo

nehageno apakafu nekiya kava hu'na lapakaemo Goti mafa'nemo hamalesayafe'mo nagafu ki'niyanage'na Kalaisikana hutapa maisayafe'mo halate mago'e huno nagafu nekiye.

<sup>20</sup> Vaehae, hu'na, na agufa gemo lapa paigufi hu'na alagepa hu'na nagesamo afisuvafe'mo lapakae'e'mo u'na maisuvafe'mo nahau'niye.

*Sela'e Hega'efe'mo anava gemo hu'niya gemae*

<sup>21</sup> Ke'aepa gemo afe'alumelagamo maigune, hutapa nehaya vaya'mogitapamo Mosese'a avo kae male'niya ke'aepa gemo aepa'amo o'afi'nafiye.

<sup>22</sup> Ani gemo'a huno'ae'mo, Emalehamu'a lole mafa'nela'mo alino anate'niye. Henaga a'amo'mo kalavusi ali'ya ne'aliya a kanomo agi'amo Hega'a mafa'nemo alino atetegenogogote a'amo afa a'mo agi'amo Sela'a mafa'nemo alino ate'niye.

<sup>23</sup> Kalavusi ali'ya ne'aliya a'mo'a ma mopafi vaya'mogita alita ne'apatona kava huno mafa'nemo alino ate'niya'monanafa afa a'amo'mo Goti'a fiku kaha mae'na kamiguve, huno ha pai'niya polomasi geleti'mo mafa'ne'amo alino ate'niye.

<sup>24</sup> Mani gemo kalafefa gemo hane'niye. Lole atala'anife'mo osu'nifa lole kotalake gelafe'mo hu'niye. Goti'a mago kotalake gemo ke'aepa ge'amo Mosese'mo Sainaigayaga avele'mo ami'niye. Hega'a kalavusi ali'ya'mo ne'aliya mafa'nemo alino ate'niya kava huno mani

kotalake gemo'a kalavusi ali'ya'mo ne'aliya mafa'nemo alino ne'apate.

<sup>25</sup> Hega'a Sainaigayaga avemo Alepiya kotega avemo aune'amo mai'niye. Sainai avemo hane'niya kava huno hemenimo hane'niya Yulusalemumo aune'amo hane'niye. Yulusalemu'e Yulusalemu mafa'ne'amogi'e'mo kalavusi ali'ya ne'aliya'monanafa

<sup>26</sup> koku'napi Yulusalemu taonimo'a afa akana huno hane'nenomuki vaya'amogita itatimokana huno hane'niye.

<sup>27</sup> Mani kavatefe'mo Goti mukufi'mo avo'mo kae male'niya gemo'a huno'ae'mo, *Anamo a kanomo mafa'nemo alika o'ate'nana a kanomogamo kamogaga aiyo. Mafa'nemo alika o'ate'nanageno kagafu oki'niya a kanomogamo kamogaga aiteka alopa gefati'mo ge huvo. Na kava higeakaene. Anau'amo'mo atale'niya akana huka mai'nana'monanafa vele'mo mai'niya a kanomo ago aeka agaseka asole mafa'nemo alika apate'nane, huno hu'niye.*

<sup>28</sup> Inagi konaga'nimogitapae, hu'na, Aisiki'a fiku kaha mae'na kamiguve, huno ha pai'niya polomasi ge'aleti mafa'nemo mai'niya kava huta polomasi ge'aleti mafa'ne'amo mai'none.

<sup>29</sup> Agufaleti'mo alino ate'niya mafa'nemo'a Auneme'aleti'mo alino ate'niya mafa'ne'ae'mo aini huno ate'niya kava hu'a hemenimo apaini hu'a nelatae.

<sup>30</sup> Nelataya'monanafa Goti mukufi'mo avo'mo kae male'niya gemo'mo, na yane, huno hu'niye. Mani gemo'a huno'ae'mo, kagaemo kalavusi ali'ya ne'aliya a kano'e mafa'ne'a'e'mo alika

hana faika anatalege'ana vi'ao. Kalavusi ali'ya ne'aliya a kanomo mafa'nemo'e afa'a mai'niya a kanomo mafa'nemo'e'mo afo'animo ya'mo magokepi o'aliga'ae, huno hu'niye.

<sup>31</sup> Inagi konaga'nimogitapae, lagaemo kalavusi ali'ya ne'aliya a kanomo mafa'ne'amo o'mai'nopa afa'a mai'niya a kanomo mafa'ne'amo mai'none.

## 5

*Afa vaya'mo mai'naya'mofe'mo afa vayake'mo maiyo, huno hu'niya gemae*

<sup>1</sup> Kalaisi'a afa vaya'mo maisunafe'mo hatu maeno late'nigeta afa vaya'mo mai'nona'mofe'mo ani kava huta lokiya vaita afa vayake'mo maigetao. Ke'aepa gemo afe'alumelagamo ali'a lapatesayafe'mo nehayanagi halate kana hu'niya ali'ya'mo alitapa kalavusifi'mo o'maiyo.

<sup>2</sup> Inagi nagaemo Polo'namo ani gemo hu'na lapa nepauvanagi afiyo. Lapakaemo, ke'aepa gemo akame hisunage'apae'mo lagufamo lagau'a atalegae, hutapa nehisyana Kalaisi'a lapa o'maegaiye.

<sup>3</sup> Nagaemo halate lokiya gemo hu'na lapa pai'nae'mo, ehetafiye, mago vekamo'a, nagufamo lagauka atalo, huno nehisiyana muki ke'aepa ge'amo alami akame huno hano hisiya kavake'mo hane'niye.

<sup>4</sup> Lapakaemo, ke'aepa gemo akame nehuna kavateti'mo Goti aulagale'mo fatago vaya'mo maigune, hutapa nehisyana Kalaisi'mo ataletapa

Goti'a fiku lapa maeno nelapamiya kavategamo o'maitapa malaga vaya'mo mai'nae.

<sup>5</sup> Inagi Goti'a, naulagale'mo fatago vaya'mo mai'nae, huno laha paisiyafe'mo Goti Auneme'aleti'mo lagesa afita fatago nehutae'mo lavayagunagu huta agava ne'maune.

<sup>6</sup> Kalaisi Yesupi'mo mai'netae'mo lagufamo lagau'nisupi olagau'nisupigeno afa'a laha o'maegaiya'monanafa lagesa afita fatago nehuna kavatimo'mo lahau layamopafi'mo lahau'niya kavateti'mo ali'ya'mo ne'alisiyana afa'a laha maegaiye.

<sup>7</sup> Hogotetapa Goti kate'mo alagepa hutapa nagu nagu hutapa u'nae. Lapakaemo lama gemo ago akame hu'nayana ina la'mo halate lapatafauno mai'niye.

<sup>8</sup> Goti'a lapakaefe'mo keya aeno ge hu'niya vekamo'a ani kavategamo heno lapavayu hulino o'me'niye.

<sup>9</sup> Falaova la'nefafi'mo aise'amo kosisiya ya'mo ali'a ne'atageno uneno nehigeno muki'amo aeno apafu leno ko nesiye.

<sup>10</sup> Ala kava nepi'mo mai'nona'mofe'mo alu lapakesamo o'afigae, hu'na lole nagesamo o'afi'na magoke nagesamo ne'afuva'monanafa ina la'mo lapakesamo ne'afiya ya'mo alino hosu huno nelapateya vekamo mai'nisifigeno Goti'a anona'alefe'mo amagigiye.

<sup>11</sup> Konaga'nimogitapae, hogote'na, lapakufamo lagauta ataleyo, hu'na hapa pai'nova'monanafa hemeni'e'mo ani agufa gege'mo hu'na ae'na hakalo hu'na hapa nepauvesinana apaini hu'a

no'nataesine. Mani gemo hapa nepauvesinana Kalaisi'a malipu yosale'mo fali'niya kavafe'mo ava gee'mo hosu apaipamo okali'naesine.

<sup>12</sup> Nagaemo lapakesamo ali'a hosu hu'a nela-pataya vaya'mogi apakai'api apakufamo hata-gau'a atalesayafe'mo nahau'niye.

<sup>13</sup> Konaga'nimogitapae, kalavusifi'mo o'maitapa afa'a maisayafe'mo Goti'a lapakaefe'mo ge hu'niye. Afa'a mai'naya'monanafa fiku yanagetapa ani kavateti'mo lapakufamo'mo hau'niya kava'mo hisiya ka'mo valitapa ategae. Valitapa o'atetapa konagatapie'mo lapau lapayamopafi'mo lapau'ninagetapa hapa maeyo.

<sup>14</sup> Muki ke'aepa gemo aepa'amo magoke ke'aepa gefi'mo hane'niya gemo'a huno'ae'mo, *kagaikae'mo kahau kayamopafi'mo nekahaiya kava huka kahaopale'mo mai'naya vaya'aife'mo kahau kayamopafi'mo kahaino*, huno hu'niye.

<sup>15</sup> Huno hu'niya'monanafa lapakaemo afela afugana hutapa hapaege kame hutapa apatege nehisyana ehetafiye lapakaitapi'e'mo fiku alita hano hutapa lapatalegayanagi.

<sup>16</sup> Ani gee'mo hu'nae'mo, Goti Auneme'amo'mo hau'nisiya kava'mo akame hutapa maigeno'ao atafa lapaipamo'mo ha'ye nehiya kava'mo ko sino afu olegaiyanagi.

<sup>17</sup> Atafa laipamo'mo Goti Auneme'ae'mo kame huno ne'ategeno'ae'mo Goti Auneme'amo'mo atafa laipae'mo kame huno ne'ate. Kame huno ne'ateyamo'mo lapau'nisiya kava'mo afa'a os-ugae.

18 Goti Auneme'amo'mo ka'mo alino ho huno nelapatesiya'mo'mo ke'aepa gemo afe'alumelagamo o'mai'nae.

19 Muki vaya'mogimo atafa apaipa apakesamo'mo hau'niya kava'mo ago age'nae. Ani kava'mo hane'niyana ve'alavefati'mo kumai kava'mo huge mafa'nefati'mo kumai kava'mo huge o'ani'ya kava'mo huge apavagage osige'a kalamogi nehaya agufa kava'mo huge nehae.

20 Aigofe goti'apimogife'mo mono nehu'apae'mo apaune kava'mo huge lusa kava'mo huge analisa apamagige apaini hu'a apatege ge vaige apaipa kafa hapaege apaipa lege apakai'apie'mo apakesamo afige alu apaipa alu apaipamo kalige ali'a fako hu'a apatege nehae.

21 Hosu apaipa kalige kamiti apamagige lusi ani'mo nete'a negi nagi gemo huge ogefage hu'a lusi kava hu'a apavamusa valete'a negi nagi huge mago'e hu'a ani agufa hosu kava'mo huge nehae. Hogote'na lapa pai'novanage'na hemenimo halate mago'e gemo, ehetafiye, hu'na lapa nepauve. Afole o'ai'niya afina'mo hogote'na lapa pai'nae'mo mani agufa hosu kava'mo nehaya vaya'mogimo Goti'a yagaino ne'apateya kopi'mo fale'a hai'a mafa'ne'apimogimo afo'apimogi ya'mo ne'aliya kava hu'a Gotitegati'mo hetama'apimo afa'a o'aligae.

22 Mani hosu kava'mo hane'niya'monanafa Goti Auneme'amo'mo apaipafi'mo alagagana huno alagepa kava'mo alino afole aino ne'ate. Ani alagepa kava'mo hane'niyana hapau apayamopafi'mo hapauge apamogaga aige



magoke apaipa apakesamo alige hosu kava'mo halate ae'a atagaina hu'a osu'a afa'a maige yuna apaipa kalite'a hapa maege muki afina'mo o'atale'a alagepa kava'mo huge

<sup>23</sup> yagu yaga hu'a maige apaipa apakesale'mo alagepa hu'a yagai'a atege hu'a ne'maiya kava'mo hane'niye. Magoke ke'aepa gemo'a mani kava'mo osiyo, huno hu'niya gemo ohane'niye.

<sup>24</sup> Kalaisi Yesu vaya'amogimo atafa apaipa apakesagi atafa apaipafati'mo nekaliya kavanagi hapa'ye nehiya kavanagi hu'a ali'a malipu yos-ale'mo nili aite'a ali'a he ti'a ate'nae.

<sup>25</sup> Goti Auneme'amo'mo afa'a maisuna kava'mo alino lami'niya'mofe'mo akame higetao.

<sup>26</sup> Vaya'mogi lagitile'mo ali'a asaga hu'a latesayafe'mo lagesamo o'afita konagatimogimo hosu apaipamo kalisiya agufa himu'namu kava'mo huta laipa kafamo ohapaetao.

## 6

<sup>1</sup> Konaga'nimogitapae, hu'na, mago hosu kava'mo'a malage huno mago konagatapimo'mo atafau'nisigeno hosu kava'mo hu'nisigetapae'mo lapakaepati'mo Goti Auneme'amo alagepa hu'a akame nehisaya vaya'mogimo yagu yaga gemo hu'a ali'a alagepa hu'a ateyo. Lapakae'e'mo lapamalageka hisagetapae'mo hosu kava'mo osisayafe'mo lapakaitapile'mo alagepa hutapa yagai'netapaeke'mo alita api aita ateyo.

<sup>2</sup> Konagatapimogimo ne'aliya kana ya'mo alita hapa maeyo. Alita hapa maesaya'mo'mo Kalaisi ke'aepa ge'amo akame hugae.

<sup>3</sup> Mago vekamo'a, ala nagi vekamo mai'nove, huno agesamo ne'afisiyana ina agufa vekamo mai'niya'mofe'mo agai'aeke'mo humi ne'ate.

<sup>4</sup> Ne'ateya'mofe'mo muki'amogi apamete apamete hu'a apakai'api kava'apimo ali'a fako hu'a agegeyo. Mago vekamo'a alagepa kava'mo nehisiyana agaemo alu vekae'mo, ago ae'na agase'nove, huno agesamo o'afino agai'a kavafeke'mo amogaga aigiye.

<sup>5</sup> Muki vaya'mogimo apamete apamete hu'a apakai'api ali'ya'apimo aligaya'mofe'mae.

<sup>6</sup> Goti ge'amo ne'afiya vaya'mogimo hu'a ali'a apaya ne'malaya tisa vaya'apimo afalu afalu kava'mo hu'a alagepa ya'apimo ali'a fako hu'a apamigae.

<sup>7</sup> Lapakaitapie'mo humi olapateyo. Lapakaemo Gotife'mo afa'a hutapa ami o'malegae. Ha'ao, na agufa avina ya'mo hakale'nisafigeno hagesigetapae'mo ani agufa ne'ya'mo aligae.

<sup>8</sup> Vaya'mogimo atafa apaipamo'mo nehaiya kava'mo nehisiyana hosu ne'ya'mo afole aisige'a alite'a faligae. Vaya'mogimo Goti Auneme'amo'mo nehaiya kava'mo nehisiyana alagepa ne'ya'mo afole aisige'a alite'a maige maige hu'a maigae.

<sup>9</sup> Alagepa kava'mo nehutae'mo alagi alaga'mo olahaegetao o'atalesunana hoyatifati'mo afu lesiya afina'mo alagepa ne'ya'mo aligune.

10 Hapa maesuna ka'mo hane'nisiya'mo'mo muki vaya'aina afa'a hapa maegauna'monanafa apakesa afi'a fatago nehaya afamo anagatimo mago'e huta hapa maegaune.

*Ge atupa gemo hu'niya gemae*

11 Hemenimo nagaemo avo kayo'mo ali'na nagai'nimo alopa avo'mo nekaovanagetapa agetetapae'mo, Polo'mo mani avo'mo kae'niye, hutapa hugae.

12 Amega apakufale kavafe'mo amuse hu'a apatesage'a ala apaki'apimo alisayafe'mo hapau'niya vaya'mogimo lokiya gefati'mo, lapakufamo lagaiyo, hu'a nehae. Kalaisi'a malipu yosale'mo fali'niya kavafe'mo ava gee'mo apaini hu'a o'apatesayafe'mo lapakufamo lagaiyo, hu'a nehae.

13 Apakufamo nelagaya vaya'mogimo apakai'apimo ke'aepa gemo akame nosaya'monanafa lagaemo lakame nehae, hu'a ala apaki'apimo alisayafe'mo hapau'nige'apae'mo, lapakufamo lagaiyo, hu'a nehae.

14 Nehaya'monanafa nagaemo mago kavatefe'mo nagi'nile'mo ali'na asaga hu'na natete'na namogaga aisufiye. Ha'ao, alagi atalegeno hano hino. Nagaemo Ala kava netimo Yesu Kalaisi'a malipu yosale'mo fali'niya kava'aeke'mo naipafati'mo namogaga ai'ninage'na hapa paisuva ge'age'mo hane'niye. Goti'a malipu yosale'mo fali'niya kavateti'mo atafa naipamo ago amagino atale'nige'na ma mopafi ya'e amega apakufale kava'efe'mo,

ina agufa kava'mo malipu yosale'mo faligekana huno hane'niye, hu'na nagesamo ne'afuge'apae'mo ma mopafi vaya'mogimo nagaefe'mo, ina agufa vekamo malipu yosale'mo nili aite'a ali'a he ti'a ate'naya agufa vekagana huno mai'niye, hu'a nehae.

<sup>15</sup> Mani kavatefe'mo hu'nae'mo, Kalaisi Yesupi'mo mai'nona'mofe'mo lagufamo lagau'nisupi olagau'nisupi ina agufa kava'mo hane'niye. Goti'a saufa vaya'mo alo huno late'niya kavake'mo kanale kava'mo hane'niye.

<sup>16</sup> Goti'a mani avo'mo nekaova gemo akame nehisaya vaya'mo agai'a vaya'mo muki lama ge Isaleli vaya'aife'mo hau huno apatenageno apaipamo'mo falu hino.

<sup>17</sup> Ge atupa ge'nimo hu'nae'mo, vaya'mogimo Ala kava ne'mo Yesutefe'mo namagi'nageno nagufale'mo nafugu'mo hane'niyanagi mago vekamo'a mago'e huno hanageke ya'mo alino o'namino.

<sup>18</sup> Konaga'nimogitapae, hu'na, Ala kava netimo Yesu Kalaisi'a fiku lapa maeno lapamino. He, lama ge.

**Saufa Kotalake Gemae**  
**The New Testament and Portions of the Old**  
**Testament in the Keyagana Language of Papua New**  
**Guinea**  
**Sampela hap Buk Baibel long tokples Keyagana long**  
**Niugini**

copyright © 2001 Wycliffe Bible Translators, Inc.

Language: Keyagana

Translation by: Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 18 Apr 2025 from source files dated 31 Aug 2023

dec78c50-71b7-5d19-97bf-bf625abcf44